

Soraarnerussutisiaqarnissamut aaqqissuussinnermut pinngitsoorani ilaanissap sunniutaasa aaqqissuussinerullu naapertuunnerata nalilersuiffigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalilersuineq UKA2023 nallertinnagu tamanut saqqummiunneqarlunilu Inatsisartunut agguanneqassaaq.

(Inatsisartunut ilaasortaq Doris Jakobsen Jensen, Siumut)

Akissuteqaat

(Aningaasaqarnermut Akileraartarnermullu Naalakkersuisoq)

Aappassaaneerinnineq

Aningaasaqarnermut Akileraartarnermullu Ataatsimiititaliaq aalajangiiffigisassatut matumunnga siunnersuummut maanna isumaliutissiisumminik saqqummiussivoq.

Isumaliutissiisummi amerlanerussuteqartut allannguutissatut siunnersuut tulliuuttoq akuerineqassasoq inassutigaa:

”Soraarnerussutisiaqalernissamut aaqqissuussap aningaasaqarnikkut patajaassutsimut sunniutaasa nalilersuiffigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Kiisalu soraarnerussutisiaqarnissamut aaqqissuussinnermut pinngitsoorani ilaaffigisassamut pinngitsoorani akiliinissap pissakinnerit atugaannut sunniutai nalilersuinermi nassuiaatigineqassapput. Tamatumani saniatigut soraarnerussutisiaqalernissamut ileqqaagaqarneq pisariinnerusumik allaffissuutigineqarsinnaanersoq nalilersuinermi aamma nalilerneqassaaq. Nalilersuineq UPA2024-mi tamanut saqqummiunneqarlunilu Inatsisartunut agguanneqassaaq.”

Naalakkersuisut Aningaasaqarnermut Akileraartarnermullu Ataatsimiititaliami amerlanerussuteqartut allannguutissatut siunnersuutaat tusaatissatut tiguaat, taannalu tunuliaqutaralugu amerlanerussuteqartut allannguutissatut siunnersuutaata akuerineqarnissaainassutigalugu.